



21. februar 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit ilinniartitaanerup kalaalinngorsarneqarnerani aningaasartuutit pillugit:

- 1. Atuartitsissutit maannakkut inuusuttut ilinniaqqiffiini atorineqartartut tamarmik kalaallisuunngorlugit nutserneqarnissaat qanoq akeqassava (GU ilaalu ilanngullugit?)**
- 2. Inuusuttut ilinniaqqiffiini atuartitsissutit nutserneqarnissaannut ukiumut aningaasartuutit qanormita amerlatigisussatut Naalakkersuisut nalilerpaat, suut tamarmik kalaallisuunngortinneqartassappata? (Apeqqut manna apeqqutigineqarpoq atuartitsissutinik nutaanik ukiut tamaasa pisisoqartalertariaqassammat)**
- 3. Naalakkersuisut qanoq eqqarsarpat nutserinermut aningaasartuutit aningaasalersornissaat eqqarsaatigalugu?**
- 4. Apeqqutinnut normu 025/2017-mut akissummi erserpoq, iinniartitsisunngorniarfimmi atuartitsissutit maannakkut atorineqartut nutserneqassappata 43 millioner koruuninik akeqassasoq. Ilinniarfinni allani qanormita aningaasartuuteqartoqassava? (Akissummi ilinniarfiit ataasiakkaarlugit immikkoortiteqquneqarput).**
- 5. Naalakkersuisut tamarmiullutik nalilernerlugu, isumatusaarnerusoq ilinniarnermut atatillugu atuartitsissutit tamarmik kalaallisuunngortinneqarnissaat, "*Sulissutigineqassasoq kalaallisuinnaq oqaasillit ilinniarsinnaalernissaat pillugu*" Naalakkersuisut takorluugaat piviusunngortikkumallkugu? (Naalakkersuisoqatigiit isumaqatigiissutaannit tigusaq)**
- 6. Aallaqqaammut ilinniakkat sorliit ineriartortissallugit Naalakkersuisut pingaarnertuunniarpaat, kalaallisuinnaq oqaasillit ilinniarnerminnik naammassinnitalernissaat periarfissinniarlugu?**
(Inatsisartunut ilaasortaq Nivi Olsen, Demokraatit)

Tunngavilersuut:

Soorlu siusinnerusukkut oqaatigereeriga oqaatsigut asasupilussuuakka. Kalaallit oqaasii oqaaseraakka siullertut, qitornama oqaaseraat siullertut aamma oqaatsima sapinngisamik annerpaamik atornissaat ilungersuutigiuarpara.



Taamaakkaluarterli aamma pivusorsioortuuvunga. Kalaallit oqaasiit ikittuinnannguanit atorneqarpoq, taamaattumik paasisariaqarparput qitornagut pitsaanerpaamik periarfississagutsigit taava allatut ajornartumik takornartat oqaasiinik ilinniartittariaqarpagut. Ilinniartitaaneq eqqarsaatigalugu tuluit oqaasiisa danskit oqaasii qaangilerpaat, ilinniaqqiffinni ilinniarnermi atugarpassuit pisariaqartimmassuk tuluttut piginnaaneqarnissaq. Kisianni danskit oqaasii suli pingaarutilerujussuupput, inuusuttorpassuit nunanut allanut ilinniariartutik avalattartut Danmark ilinniariarfissatut toqqartarmassuk, nunatta Danmark siivisuumik pitsaasumillu ilinniartitaanikkut suleqatiginikummagu.

Taamaattumik tamanna tunngavigalugu nuanniilliutigikujuppara Ilinniartitaanermut Naalackersuisup innuttaasut putusaarmagit oqarluni siunissami ilinniartoqarsinnaalissasoq kalaallit oqaasii kisiisa atorlugit. Pivusorsiuunngilluinnarpoq paarlattuanillu eqqartornerusariaqaraluarparput qanoq iliorluta meerartagut inuusuttagullu ilinnialernissaannut pitsaanerusumik piareersarinnaanerlugit, tassani pisariaqarmat allattariarsornikkut oqaatsitigullu takornartat oqaasiinik atuinissaq.

2017 aallartittoq qulequtaq taanna pillugu Naalackersuisunut apeqqummik (025/2017) nassiussivunga. Akissutigineqartut tamakkiisuunngivippuut tamannarpiarlu pissutaavoq qulaanit apeqquteqaqqinninnut. Akissulli ataaseq sukumiisuvoq taannalu uani ersersilaassavara. Ilinniarfissuaannarmi ullumikkut atuartitsissutit atorneqartut kalaallisuunngortinneqassappata tamanna 43 millioner koruuninik akeqassaaq, 43 millioner koruuninik! Ilinniarneq ataasiinnaq uani pivarput. Eqqarsaatigilaariartigu ilinniarfiusinnaasut tamaasa taama iliorfigisuugutsigit qanoq akeqassanersoq. Aamma puigussanngilarput ilinniartitsinermi atukkat tamarmik nutarternegartuartartussaammata, taamaattumik aningaasartuutit ataasiaannarluni aningaasartuutaanaviangillat.

Uanga tamakku milliuunerpassuit Meeqqat atuarfinni oqaatsinik atuartitsinerup nutarternissaanut pitsanngorsarnissaanullu atorusunneruakka, taamaasiorluta meerartagut inuusuttagullu piareersarluarnerusinnaagatsigit avaqqunneqarsinnaanngitsoq kalaallit oqaasiisa saniatigut takornartat oqaasiinut piginnaaneqarnissaq, killilersorneqarani ilinniarusutamik sumilluunniit toqqaarusukkaanni.

Kissaatigaara ullut suliffiit naliginnaasut qulit iluanni apeqqutikka akineqassasut.